

ւղ.

Գոն հեռի ի մատրասու իբրև երկու ժամաւ երկու բլրաձև լերինք՝ մին մեծ և միւսն փոքր, յորոց վերայ գոն եկեղեցիք ուխտատեղիք սրբոյն թովմայի առաքելոյն, ի բազմաց հետէ ի մտի ունէին տանել զմեզ անդ. այլ վասն յուով զբաղանաց իւրեանց, ոչ ժամանեցին տանիլ մինչև ցայն օր: Ուստի յայնմ աւուր խորհեցան ի միասին պարոն յովհաննէսն և պարոն միքայէլն, և առեալ տարան զմեզ ի լեառն մեծ, ուր տեղի նահատակութեան է, ասեն, սրբոյն թովմայի: Ի գագաթ լերինն էր եկեղեցի մի յորում էր հրաշագործ պատկեր սուրբ աստուածածնին, և խաչ մի փորագրեալ ի վերայ վիմի. զորմէ, ասեն, փորագրեալ ի սրբոյն թովմայէ: Եւ անդ նստի հաւնապազ փատրի մի օգոստինեան: Ի ստորէ լերինն մինչև ի վեր արարեալ է սանդուխտ ընդարձակս ի կոփածոյ վիմաց, այլ և կամուրջ մի մեծակառոյց ևս ճանապարհաւն՝ հանգուցեալ պարոն պետրոսն ոսկանեան՝ ի դիւրութիւն ուխտաւորաց. յորոց ի շինուածս ծախեալ է երեսուն հազար ոսկի: Եւ քանզի եհաս ի վերայ մութ գիշերոյն, ոչ ժամանեցաք երթալ ի լեառն փոքր, ուր տեղի աղօթիցն է սրբոյն թովմայի. այլ եկեալ ազաք ի լոյսն անուանեալ տեղւոջ առ փատրի մի փրանկիսկեան, ուր գոյ եկեղեցի շինեալ յանուն սուրբ աստուածածնին: Եւ յառաւօտու յարուցեալ՝ եկաք անտի ի մելափօռ ի սուրբն թովմաս, ողջոյն տալ եպիսկոպոսին...: Իսկ վասն քաղաքին մատրասու՝ ծանիք, զի է այն ի սկզբանէ ընդ տէրութեամբ անգղիացւոց. և ունի բերդ ամրակառոյց ըստ ամրոցացն եւրոպիոյ: Ունէին փատրիքն կափուշինք յառաջագոյն յամրոցի անդ զեկեղեցի մեծակառոյց, և բնակարան ընդարձակ. որոց և զպէտսն տային անգղիացիքն ամ ըստ ամէ: Այլ ի լինիլ առաջին պատերազմին Գաղղիացւոց ընդ անգղիացւոց յառաջ քան զամս ԺԲ, յաւնուլ գաղղիացւոյն զմատրաս, և յանդրէն դարձուցեալ յետ ամաց ինչ, աւերեալ էին անգղիացիքն զեկեղեցին կափուշինաց, և հանեալ զնոսա յամրոցէ անտի, որպէս և զայլ օտարազգիս. զի կարծիս իմն առեալ էին եթէ նոքա արգելեալ էին ի ժամանակի մարտին՝ պատերազմիլ ուղղափառաց յամրոցէ անտի ընդ գաղղիացիս: Եւ քանզի ունէին փատրիքն և զայլ եկեղեցի մի արտաքոյ բերդին ուր այժմ բնակութիւնն է հայոց, անդ գնացեալ բնակէին: Այլ գայն ևս առեալ են այժմ, և արարեալ հիւանդանոց գինուորաց, մինչև շինեցցեն զհիւանդանոց: Առեալ էին ընդ այնմ և զեկեղեցին հայոց, բայց այժմ անդրէն տուեալ են նոցայն: Եւ փատրիքն գնացեալ բնակին այժմ արտաքոյ քաղաքին ուր ունէին յառաջագոյն զփոքրիկ եկեղեցի մի, զոր այժմ ընդարձակեալ են: Եւ անդ երթան ուղղափառքն մեծաւ աշխատութեամբ՝ տեսանել պատարագ ի կիրակէս և ի տօնս: Օղն մատրասու, ըստ վկայելոյ բազմաց, բարեգոյն է քան զօղն բանգալու. բայց տօթն յամառան փոքր մի սաստիկ քան զնորայն: Կերակրեղէնքն ոչ այնչափ դիւրագին են: Բնակիչք քաղաքին են անգղիացիք, հայք և այլ քրիստոնեայք յայլոց ազգաց, մահմետականք հնդիկք, և կապալաք բազումք յոյժ, որք ունին մեհեանս բազումս արտաքոյ բերդին ի բնակութիւնս իւրեանց, զորոց զմին՝ որ մօտ բերդին՝ աւերեալ էին անգղիացիքն, որպէս և զայլ ամենայն բնակութիւնս, որք շուրջ զբերդաւն էին. և այժմ շինեալ են փոխանակ այնր զայլ նորոգ ծախիւք իւրեանց. զորոյ զառաջին քարն հիման եղեալ է կուպեռնաթօռն ինքնին: Քաղաքն մատրաս է բուն տեղի դալէմ քարին...: Ի գալն մեր ի մատրաս՝ խոտովութիւն և աղմուկ մեծ էր ի մէջ ամենայն վաճառակաւնացն հայոց. քանզի տուեալ էին գրեթէ ամենեքին առն միում մեծատան ի հայոց անտի ի բեզու գաւառին հնդկաց դրամս յուովս իբրև ԽՁ հազար ոսկի. զի ի գալ նաւու նորա ք մատրաս և ի վաճառել զինչսն, առցէ իւրաքանչիւր զբաժին դրամոց իւրոց: Այլ ի գալ նաւուն և ի վաճառելն զինչսն, տեսին զի և ոչ զչորրորդ մասն դրամոց իւրեանց կարէին ի ձեռս բերել: Վասն որոյ ի բազում աւուրս խորհուրդ խորհէին՝ գտանել հնարս և ողջոյն ի ձեռս բերել, առանց ելանելոյ ի դատաստան: Հուսկ յետոյ խորհեցան, զին հատանել նաւուն ի միջի իւրեանց. և անդրէն առաքել առ տէր իւր. զի եթէ նա անդրէն առցէ զնաւն, վճարեցէ զպարտոս նոցա ողջոյն. ապա թէ ոչ՝ ինքեանք լցեալ անտի ինչս՝ բերցեն և վաճառեսցեն: Արարին թուղթ և ստորագրեցին ամենեքին: Բայց քանզի փեսայ առն այնորիկ որ վերակացուն էր նաւուն, ամաւ միով յառաջ նենգութիւն ինչ գործեալ էր ընդ պարոն յովհաննէսն, ըստ թելադրելոյ ոմանց ի հայոց անտի հակառակորդաց պարոն յովհաննէսին, ինքն պարոն յովհաննէսն ոչ միաբանէր ընդ խորհուրդս նոցա, և ոչ ստո-